

【遊寮溫泉鄉】徐姿華原作

寮日，阿爸帶佢兜去谷關遠寮，車仔行在東西橫貫公路頂，窗門外背藍天白雲、青山綠水間等各色農舍，分人心情開闊，精神舒爽。

阿爸安排先去八仙山森林遊樂區蹶山，這位个天當清、空氣也當好，比平地較涼爽，驚寒个八仙山主峰還圍等一圈蓬白个濛沙頸圍呢！停車場脣有幾下頭慢開个水紅色山櫻花同正暴出嫩青幼芽个松樹，還有幾頭仔開到榮榮榮个雪白李花，蜂仔、蝶仔也在花間上上下下，襯等後背深深淺淺个綠色樹林。

春天同八仙山變做畫布，靚到奈毋得；毋驚人个畫眉、山雀同五色鳥在樹極頂跳上跳下，這片啾啾、該片嘰嘰像在該比賽唱歌仔，實在還錫人啊！佢兜跔等步道定定仔蹶往上，行在浸青个竹林肚，風一吹竹葉就晰晰嗖嗖，像係搶等講歡迎佢兜來遠寮，日頭花對竹葉縫肚箭出來，篩出一絲一絲、一點一點金黃色个光線，掖到歸地泥，就像仙境个樣仔。

蹶山流到一身汗，佢兜就去飯店泡溫泉。谷關个溫泉係碳酸泉、略略仔白色有一息仔硫磺味，係中臺灣盡老个溫泉，既經有百過年个歷史，日本明治天皇還同這溫泉賜名「明治溫泉」呢！阿姆想去泡露天溫泉，佢講外背有風較涼，泡溫泉較舒爽。露天溫泉逐窟溫度都無共樣，做得擇自家適合个溫度來泡，阿爸阿姆同洗過冷水个面帕摺好放在頭那頂，講恁

仔正毋會熱到頭那艱苦，佢兜目眯眯仔泡溫泉、打嘴鼓，當享受个樣仔。

佢同老妹無時間，這窟泡一下、該窟浸一下，一下燒、一下冷試著當生趣；恁多窟溫泉裡肚，盡生趣个係有一窟淺淺仔个溫泉，裡肚有當多紅羅花色个溫泉魚，佢兜个腳一伸啊入去魚仔就洄兼來，相爭背佢兜腳盤同腳趾罅个腳皮，這兜魚仔拈拈攀又癢又撓，害佢兜笑到吃吃滾¹，毋得結煞。

泡好溫泉，老妹笑講大家圓身浸到紅紅當像煮熟个蝦公，佢試著大家坐在溫泉窟肚，燒氣緊衝已像在該煮火鑊仔，阿姆講泡好溫泉皮膚變較幼、較滑，阿爸試著歸身仔鬆爽、精神加已好。啊！泡溫泉帶分佢兜無共樣个趣味呢！佢兜散步去電廠招待所買枝仔冰食，泡溫泉泡到熱熱，坐在樹下吹等涼凉个風，咬一口冰冰甜甜个枝仔冰，實在還幸福哪！

1 吃吃滾：音 kid kid gunˋ；狀聲詞。形容笑聲。

【大黃狗摺烏斑貓】曾菁怡原作

莊下人大體都會畜狗仔來掌屋，畜貓仔來逐老鼠。吾屋下乜共樣，畜等一隻大黃狗摺歸群花喇必駁个貓仔。毋過，狗仔係確確實實畜等，逐餐都同佢兜共下食；貓仔嘅係看厥心情來來去去，有成時飯桌下七、八隻跔等、橫等；有成時淨伸一隻白底烏斑个老貓嫲。

吾屋摺隔壁鄰舍離當遠，照佢細人仔行路个時間差毋多愛半點鐘。佢無恁煞猛行路去尋搞寮伴仔，故所屋下个大黃狗摺烏斑貓就係同佢做伴、搞寮个朋友。

聽阿婆講，大黃狗係阿公用一斤冰糖摺人換轉來畜个，正來該下還係半大細仔个狗子。這隻狗牯仔活跳好搞，逐日就跔等佢挨挨轉。佢同佢比賽走相逐，聽著佢喊：「預備」該下，佢乜知愛伏等；聽著「開始」，佢還正經會飆出去，實在生趣！大黃狗做搞寮伴仔已做得，毋過做保鏢就無及格咗。

有一擺，阿婆畜个大火雞走出來，佢兜看著佢兜像看著冤仇人樣仔，烏色个雞毛膨到像圓球仔，面紅濟炸，還「咕嚕咕嚕……」喊無停，緊逼緊近。佢佬著大黃狗會走出去大聲吠，同該群火雞嚇走。無想著，佢嘅走到尾瀉屎，毋知因到哪位去？佢在心肝肚發誓：「下二擺，餅仔絕對無愛分佢食咧！」

烏斑貓對佢有印象開始就生活在吾屋下，用貓仔个年齡來算，厥歲數做得做阿婆哩！烏斑貓个性體已好，毋會搶食，乜無看過佢同別隻貓仔相打。食飽咗，佢會尋一個鬆爽个地方啄目睡；睡飽咗，就伸一下懶筋、擘一下嘴，摺自家个毛舐淨來，正出去遶寮。莫看佢食得、寮得，其實佢係已顧家个貓嫲。

有一日暗晡，烏斑貓在暗摸胥疏个禾埕噉噉滾，屋下人聽出這聲無共樣，擎手電筒仔行兼去看，嘅看著烏斑貓在一尾有吾手髀恁粗个飯匙銑脣項迂來迂去。好得有這隻大膽个貓嫲，正無分該尾蛇哥趕入屋肚。

大黃狗摺烏斑貓毋單淨係吾搞寮伴仔，佢兜乜像吾屋下人共樣恁有感情。佢識聽先生講過狗仔、貓仔个壽命無恁人恁長，有成時想著大黃狗摺烏斑貓有一日會先離開，心肝頭酸酸，就像分石頭砵等樣仔，敢講這就係毋盼得个感覺？